

Borgarnesi, 28. september 2021

Varðar: Framkvæmd kosninga til Alþingis 25. september 2021 og talning atkvæða.

Vísað er til beiðni landskjörstjórnar um greinargerð yfirkjörstjórnar Norðvesturkjördæmis vegna kosninga til Alþingis laugardaginn 25. september sl. Vegna þessa skal þetta tekið fram:

- Eftir að kjörkassar bárust á talningarstað á Hótel Borgarnesi, sbr. meðfylgjandi fundargerð, fór afstemming fram, í kjölfarið voru atkvæði flokkuð í alla vega tveimur umferðum og síðan voru þau talin í alla vega tveimur umferðum. Bæði flokkun og talning gekk á milli talningarfólks.
- Þegar ákvörðun um endurtalningu hafði verið tekin á sunnudag hringdi ég í umboðsmenn framboða þ.e. þeirra sem náðist til. En vegna þessa skal sértaklega tekið fram að vegna Pírata hringdi ég í þann aðila sem hafði afhent framboðslista þeirra á sínum tíma en hann svaraði ekki. Skömmu seinna hringdi Magnús Norðdahl, sem skipaði fyrsta sæti listans, til mín en hann hafði frétt af fyrirhugaðri endurtalningu. Hann tjáði mér að hann ætlaði að mæta en ég sagði honum að hugsanlegt væri að endurtalning yrði aðeins byrjuð þegar hann myndi koma á staðinn. Þeim umboðsmönnum sem voru mættir var gefinn kostur á að fara inn í salinn og fylgjast með endurtalningunni og Magnús fékk leyfi til að skoða með mér þá atkvæðaseðla sem voru auðir og þá sem höfðu verið úrskurðaðir ógildir.
- Endurtalning atkvæða fór þannig fram að fyrst var öllum atkvæðabunkum flett og athugað hvort atkvæði í hverjum bunka tilheyrðu örugglega ekki öll sama listabókstaf. Síðan voru öll atkvæði talin aftur í 50 atkvæðabunka.
- Þegar hlé var gert á fundi yfirkjörstjórnar á sunnudagsmorgun voru kjörgögn varðveitt í sal á Hótel Borgarnesi þar sem talningin fór fram. Við innganginn í salinn eru öryggismyndavélar. Að lokinni endurtalningur voru kjörgögn þ.m.t. atkvæðaseðlar flutt í innsiglaðan fangaklefa á lögreglustöðinni í Borgarnesi.
- Um það leyti sem ég mætti aftur á talningarstað rétt fyrir hádegi á sunnudaginn fékk ég símtal frá formanni landskjörstjórnar og athygli okkar var vakin á því að það munaði litlu varðandi uppbótarsæti í Norðvestur- og Suðurkjördæmi og hvort það gæfi okkur tilefni til að skoða málið nánar. Vegna ábendingarinnar var farið yfir atkvæði greidd C lista Viðreisnar. Í fyrsta C atkvæðabunka sem ég tók upp reyndust vera átta atkvæði sem tilheyrðu D lista og eitt atkvæði sem tilheyrði B lista. Í framhaldi af því fór yfirkjörstjórn yfir öll atkvæði C lista þ.e. athugaði hvort öll önnur en fyrrgreind atkvæði D og B lista tilheyrðu ekki örugglega C lista. Svo reyndist vera en þá lá fyrir að mannleg mistök höfðu átt sér stað við talningu atkvæða undir morgun og níu atkvæði höfðu ranglega lent í atkvæðabunka C lista sem tilheyrðu öðrum framboðslistum. Með hliðsjón af þessu taldi yfirkjörstjórn ekki annað fært en að endurtelja öll atkvæði sem

talinn höfðu verið og yfirfara annað sem kynni að hafa leitt til þess að fyrrgreind niðurstaða um fjölda atkvæða hvers framboðslista væri ekki rétt.

Niðurstaða talningar að morgni sunnudags var þessi:

Stjórnmalaflokkur:	Atkvæðafjöldi:
• Framsóknarflokkur B listi	4.443
• Viðreisn C listi	1.072
• Sjálfstæðisflokkur D listi	3.887
• Flokkur fólksins F listi	1.513
• Sósíalistaflokkur J listi	721
• Miðflokkur M listi	1.283
• Frjálslyndi lýðræðisfl. O listi	72
• Píratar P listi	1.082
• Samfylking S listi	1.196
• Vinstri hreyf. grænt framboð V listi	1.979
• Auðir seðlar	394
• Aðrir ógildir seðlar	24

Samtals greidd atkvæði 17.666

Niðurstaða endurtalningar var þessi:

Stjórnmalaflokkur:	Atkvæðafjöldi:
• Framsóknarflokkur B listi	4.448
• Viðreisn C listi	1.063
• Sjálfstæðisflokkur D listi	3.897
• Flokkur fólksins F listi	1.510
• Sósíalistaflokkur J listi	728
• Miðflokkur M listi	1.278
• Frjálslyndi lýðræðisfl. O listi	73
• Píratar P listi	1.081
• Samfylking S listi	1.195
• Vinstri hreyf. grænt framboð V listi	1.978
• Auðir seðlar	382
• Ógildir seðlar	35

Samtals greidd atkvæði 17.668

Vegna breytinga frá fyrri talningu tekur yfirkjörstjórn þetta fram:

- Heildaratkvæðum fjölgaði um tvö vegna innsláttarvillu í lok fyrri talningar
- Auðir seðlar voru í fyrri talningu taldir vera 394 en reyndust vera 382 og hafði því fækkað um 12. Skýringin á því er sú að 11 af þessum seðlum voru ógildir en höfðu fyrir mistök verið taldir með auðum seðlum. Einn seðill sem talinn hafði verið ógildur var það sannanlega ekki þar sem ekkert auðkenni var á honum nema X í kassanum fyrir framan viðkomandi listabókstaf. En það skal tekið fram að þessi atkvæðaseðill tilheyrði hvorki C né M lista.

- Atkvæðum C lista fækkaði um níu og höfðu þau mislagst en átta þeirra áttu að vera í D bunka og eitt í B bunka, sbr. framanritað.
- Atkvæðum D lista fjölgaði um 10 en þar af voru átta í atkvæðabunka C lista, sbr. ofanritað og tvö önnur höfðu mislagt í aðra bunka en D lista.
- Allar aðrar breytingar eru vegna þess að eitt og eitt atkvæði hafði mislagst í atkvæðabunkum.

Yfirkjörstjórn tekur fram að þær breytingar sem urðu við endurtalningu eru vegna mannlegra mistaka og harmar yfirkjörstjórn að þær hafi átt sér stað og biðst velvirðingar á þeim. En með endurtalningunni telur yfirkjörstjórn að hún hafi leiðrétt þessi mistök og þar með hafi rétt niðurstaða fengist.

Það skal tekið fram að það munu vera til upptökur úr öryggismyndavélum sem sýna innganginn í salinn þar sem talning fór fram og þær eru komnar til lögreglu. Ég hef ekki skoðað þær en væntanlega hef ég ekki heimild til þess vegna sjónarmiða um persónuvernd.

Beðist er velvirðingar á því að greinargerð þessi og fundargerð yfirkjörstjórnar berst ekki landskjörstjórn fyrr en nú í dag en ástæða þess er sú að undirritaður þurfti í gær að vera viðstaddur útför á Akureyri og fékk heimild hjá starfsmanni yfirkjörstjórnar til að skila greinargerð þessari og fundargerð nú í dag.

f.h. yfirkjörstjórnar Norðvesturkjördæmis

Ingi Tryggvason oddviti.